

# Il president dals ustiers pretenda ina scolaziun

Il president da Gastro Grischun ha inoltrà ina incumbensa en il cussegl grond

DAD ANDREAS CADONAU / ANR

■ Il deputà e president da la Uniun grischuna dals ustiers Sepp Caluori ha inoltrà en il cussegl grond ina incumbensa che pretenda dal chantun dad introducir danovamain ina scolaziun fundamentala dals ustiers per dastgar surpigliar ina ustaria. Pretendidas vegnan tranter auter enconuschientschas fundamentalas en dumondas dal dretg da la igiena da mangiativas e dal dretg social. A partir da l'onn 1998 retschaiva mintga persuna dal chantun Grischun ina concessiun da manar ina ustaria sch'ella nun ha violà repetidamain la lescha da las mangiativas u sch'ella n'è betg crudada en egl pervia da surpassar la lescha penala en connex cun exequir la lavur dad ustier. Per Gastro Grischun, l'Uniun grischuna dals ustiers, è la pratica actuala da conceder ina concessiun memia liberala e l'uniun è da l'avis che la soluziun actuala na saja betg sa cumprovada. I nun è l'emprima giada che Gastro Grischun emprova dad intimar la legislativa grischuna da midar la lescha e da pretender ina scolaziun minimala da futuras ustieras e futurs ustiers per retschaiver dal chantun la concessiun per surpigliar in manaschi. Enfin ussa nun han ni la regenza ni il cussegl gronda laschè persaver da reintrodurir la patenta dad ustiers. Durant la sessiun dal december dal cussegl grond ha il president da Gastro Grischun e deputà, *Sepp Caluori*, lantschè ina ulteriura emprova cun ina incumbensa per mauns da la regenza grischuna. Quella incumbensa pretenda ina midada da la lescha d'ustarias, principalmain la pratica da concessiuns. Sepp Caluori e ses cunsignaders giavischan da la regenza da formular en la lescha pretensiuns fundamentalas dals futurs ustiers pertutgant



Scolaziun fundamentala per tut ils futurs ustiers pretenda il president da Gastro Grischun e deputà Sepp Caluori.

MAD

la igiena da mangiativas, segirtad da la lavur, enconuschientschas da las assicuranzas socialas, dretg da lavur e da la taglia sin la plivalur.

## Gidar ad augmentar la qualidad

Sepp Caluori è persuadi che las enconuschientschas fundamentalas gidassan ad augmentar la qualidad da la gastronomia grischuna e che la publicitad pudess profitar. Cun pretender enconuschientschas

fundamentalas en quels singuls secturs fissan las futuras ustieras ed ils futurs ustiers pli qualifitgads da manar ils manaschis. Il president da Gastro Grischun ha visà en sia incumbensa a las employadas ed als employads che pudessan medemamain profitar da las enconuschientschas pli fundadas da lur patruns. Quai en connex cun pajar ils salaris a moda correcta e medemamain las contribuziuns a las assicuranzas socialas. I saja la

finfinala er a favur da l'interess general sch'il maun public na stoppia betg nudar sperditas per exempel entras la taglia sin la plivalur. Il president da Gastro Grischun e deputà scriva en sia incumbensa dad in svilup pauc agreabel. Il dumber dals manaschis da gastronomia sa reducchia cuntinuadamain. Bliers manaschis avrian las portas per serrar puspè en curt temp, magari en consequenza dad in concurs. El scriva dad ina sperdita da re-

putaziun per la branscha ed era per il chantun turistic Grischun.

## Ina soluziun moderata

Sepp Caluori ha punctuà ch'el garegia sulet ina soluziun moderata che na custia betg bler e che na cuzzia betg memia ditg. El s'imagina ina scolaziun modulara dad almain duas enfin trais emnas. Il president da Gastro Grischun ha visà a la scolaziun che sia uniun porschia gia uss e che vegnia frequentada a moda facultativa. Dentant betg gist da las personas ch'avessian il pli da basegns dad ina scolaziun. L'engaschi chantunal vesa il deputà sulet quai che pertutga ils examens. Da princip, uschia Sepp Caluori, sappia in ustier era far l'examen senza scolaziun e sch'el reusseschia saja quai er en urden. Che la scolaziun e l'examen muntian in ulteriur obstachel per l'ustaria pitschna dal vitg na crai il president da la uniun dals ustiers grischuns betg. Gist perquai che sia pretensiun saja fitg moderata. El ha visà al grond sustegn dal cussegl grond per sia incumbensa. Betg main che 80 deputadas e deputads han sutscrit sia incumbensa uschia che Sepp Caluori crai dad esser sin buna via cun sia pretensiun. Ina pretensiun ch'el valitescha sco part dad ina offensiva generala da Gastro Grischun da meglierar la reputaziun da la gastronomia grischuna. Sepp Caluori fa attent en sia incumbensa a la pratica en ulteriurs chantuns da la Svizra orientala. Per exempel ha el numnà il chantun Son Gagl nua che l'introduziun dad ina scolaziun per futurs ustiers vegnia discussa. En ils chantuns Turgovia ed Appenzell Dadens saja la scolaziun fundamentala gia instradada. Ina scolaziun fundamentala per conceder als ustiers la concessiun enconuschian 16 chantuns, scriva Sepp Caluori.